

Bosna i Hercegovina
Federacije Bosne i Hercegovine
Tuzlanski kanton
Općina Gračanica
OPĆINSKI NAČELNIK
Broj: 02-44-03544/2014
Datum, 20.10.2014.g.

Na osnovu člana 15. Zakona o principima lokalne samouprave („Službene novine Federacije Bosne i Hercegovine“, broj 49/06.), člana 36. Statuta Općine Gračanica („Službeni glasnik Općine Gračanica, broj 4/09.), a u vezi sa Zakonom o finansiranju pomoći za otklanjanje posljedica prirodne nesreće i obnovu područja zahvaćenih prirodnom nesrećom („Službene novine Federacije Bosne i Hercegovine“, broj 59/14.), Uredbom o kriterijima za dodjelu sredstava za otklanjanje posljedica prirodne nesreće i obnovu područja zahvaćenih prirodnom nesrećom („Službene novine Federacije Bosne i Hercegovine“, broj 66/14.) i Odluke Vlade TK o utvrđivanju prioriteta u raspodjeli sredstava privrednim subjektima na području Tuzlanskog kantona koji su pretrpjeli štete usljed prirodne nesreće broj: 02/1-14-021842/14 od 23.09.2014. godine, Općinski načelnik donosi

ODLUKU

o raspisivanju javnog konkursa za raspodjelu sredstava privrednim subjektima na području Općine Gračanica koji su pretrpjeli štete usljed prirodne nesreće

Član 1.

Raspisuje se javni konkurs za raspodjelu sredstava privrednim subjektima na području općine Gračanica koji su pretrpjeli štetu usljed prirodne nesreće uzrokovane obilnim kišnim padavinama koji ispunjavaju slijedeće uslove:

1. Da im je nadležna općinska komisija zapisnički konstatovala štete pruzrokovane prirodnom nesrećom
2. Da imaju sjedište poslovanja ili izdvojenu poslovnu jedinicu u općini na području Općine Gračanica,
3. Da su privredna društva u privatnom vlasništvu ili samostalni privrednici (trgovci, ugostitelji ili obrtnici) registrovani u skladu sa važećim propisima,
4. Da zapošljavaju do 3 uposlenika računajući i vlasnika.

Član 2.

Za raspodjelu sredstava iz prethodnog člana ove Odluke, obezbjeđuju se sredstva Federalnog fonda za pomoć nastradalim područjima od prirodne nesreće na teritoriji Federacije Bosne i Hercegovine, na način da su određena novčana sredstva u ukupnom iznosu od 600.000,00 KM (slovima: šestotinahiljadaKM) za potrebe privrednih subjekata s područja Tuzlanskog kantona, a da su ista članom II Odluke Vlade TK o utvrđivanju prioriteta u raspodjeli sredstava privrednim subjektima na području Tuzlanskog kantona koji su pretrpjeli štete usljed prirodne nesreće broj: 02/1-14-021842/14 od 23.09.2014. godine, raspoređena po Općinama kantona tako da je našoj Općini određen iznos od 60.000,00 KM (slovima:

šezdesethiljadaKM) pri čemu je pojedinačna vrijednost bespovratnih sredstava po jednom korisniku 2.000,00 KM (slovima: dvijehiljadeKM).

Član 3.

Sredstava za raspodjelu privrednim subjektima za saniranje posljedica prirodne nesreće na području Općine Gračanica namjenjena su za:

1. Nabavku mašina i opreme,
2. Popravak mašina i opreme,
3. Nabavku sirovina i drugog materijala za redovno obavljanje registrovane djelatnosti,
4. Građevinske radove na sanaciji objekata.

Član 4.

Prihvatljivim troškovima se smatraju svi dole navedeni troškovi, a koji su nastali u periodu od datuma nastanka prirodne nesreće, do dana objavljivanja javnog konkursa. Prihvatljivim će se smatrati sljedeći troškovi (vezani za dozvoljenu namjenu utroška sredstava):

1. Troškovi vezani za nabavku mašina, postrojenja i opreme, mjernih i kontrolnih uređaja i instrumenata, dijelova, te računarske opreme i programa koji su sastavni dio mašina i opreme, odnosno proizvodnog sistema,
2. Troškovi vezani za popravku mašina, postrojenja i opreme, mjernih i kontrolnih uređaja i instrumenata, te računarske opreme namijenjene isključivo za obavljanje poslovne djelatnosti,
3. Troškovi nabavke obrtnih sredstava i ostali troškovi potrebni za redovno obavljanje registrovane djelatnosti,
4. Troškovi nabavke građevinskog materijala i građevinskih radova za sanaciju oštećenih objekata,

Da bi bili predmet raspodjele novčanih sredstava iz člana 1. ove Odluke troškovi moraju biti knjigovodstveno evidentirani kod korisnika sredstava.

Član 5.

Sredstva će se raspodjeljivati prema sljedećim kriterijima:

1. Broj održanih radnih mjesta – maksimalno 30% bodova,
2. Step en oštećenja u odnosu na imovinu privrednog subjekta - maksimalno 30% bodova,
3. Da je ostvarilo pozitivan poslovni rezultat prije prirodne nesreće – maksimalno 20% bodova,
4. Da je uredno izmirivalo poreske obaveze i obaveze prema zaposlenim – maksimalno 20% bodova.

Dodatne informacije, podaci i dokumentacija u postupku evaluacije pristiglih prijava, mogu biti zahtijevani.

Član 6.

Općinski načelnik će, na prijedlog Službe za poduzetništvo, lokalni razvoj i finansije, raspisati javni konkurs za raspodjelu sredstava privrednim subjektima na području općine Gračanica koji su pretrpjeli štetu usljed prirodne nesreće uzrokovane obilnim kišnim padavinama i iste objaviti u jednom dnevnom listu, na web stranici Općine Gračanica, oglasnoj tabli Općine Gračanica, Udruženja poslodavaca i samostalnih privrednika, udruženja obrtnika i oglašavanjem na Radio Gračanici.

Član 7.

Radi provođenja javnog konkursa, Općinski načelnik će na prijedlog Službe za poduzetništvo, lokalni razvoj i finansije formirati Komisiju, koja ima predsjednika i 4 člana, različitih struka, od kojih je najmanje jedan predstavnik asocijacija privrednika.

Na osnovu pristiglih prijava, Komisija će po potrebi izlaziti na teren, provjeravati navode podnosioca zahtjeva, i po službenoj dužnosti pribavljati dokumentaciju od nadležnih organa.

Po okončanju provjere i kompletiranju dokumentacije iz prethodnog stava ovog člana, Komisija vrednuje i boduje prijave o čemu sačinjava zapisnik i rang listu korisnika sa pojedinačnim iznosom novčane pomoći.

Član 8.

Rang listu iz člana 7. stav 3. ove Odluke, Komisija objavljuje na oglasnoj tabli Općine Gračanica, Udruženja poslodavaca i samostalnih privrednika, udruženja obrtnika, web stranici Općine Gračanica na adresi www.opcina-gracanica.ba i dostavlja svim učesnicima javnog konkursa.

Član 9.

Protiv rang liste iz člana 8. ove Odluke svaki učesnik javnog konkursa može podnijeti prigovor Drugostepenoj komisiji za rješavanje po prigovoru u roku od 3 (tri) dana od prijema Rang liste iz člana 8. ove Odluke.

Prigovorom se može tražiti preispitivanje provedene procedure u smislu eventualnih propusta u ocjeni prijava korisnika od strane Komisije iz člana 8. ove Odluke.

Drugostepenu komisiju iz stava 1. ovog člana, u sastavu predsjednik i dva člana, imenuje Općinski načelnik.

Član 10.

Drugostepena komisija iz prethodnog člana ovog Pravilnika razmatra prigovore, te utvrđuje njihovu osnovanost.

Ukoliko Drugostepena komisija utvrdi da su prigovori osnovani, izmijenit će rang listu, a ako utvrdi da prigovori nisu osnovani odbit će prigovor kao neosnovan.

O svojoj odluci po prigovoru, Drugostepena komisija obavještava podnosioca zahtjeva i Općinskom načelniku dostavlja konačnu rang listu s nacrtom odluke o odabiru korisnika i iznosu dodijeljenih sredstava u roku od 7 (sedam) dana od dana isteka roka za prigovor.

Član 11.

Općinski načelnik razmatra nacrt i usvaja Odluku o odabiru korisnika sa iznosom dodijeljenih sredstava.

Odluka Općinskog načelnika je konačna i protiv nje se ne može izjaviti žalba ili neki drugi redovni pravni lijek.

Član 12.

Sa korisnicima sredstava i predstavnicima općine Gračanica direktor Fonda će potpisati ugovor.

Dobivena sredstva korisnik je dužan iskoristi za namjenu plaćanja troškove sanacije objekta, što će se precizirati ugovorom iz prethodnog stava ovog člana.

Nakon realizacije potpisanih ugovora korisnici sredstava dužni su dostaviti Općini Gračanica dokumentaciju o namjenskom utrošku sredstava, kako bi ista bila prosljeđena Vladi Tuzlanskog kantona i Federalnom fondu za pomoć nastradalim područjima od prirodne nesreće na teritoriji Federacije Bosne i Hercegovine.

Član 13.

Isplatu odobrenih novčanih sredstava će vršiti Služba za poduzetništvo, lokalni razvoj i finansije, na osnovu ugovora iz prethodnog člana ovog Pravilnika na račune korisnika pomoći.

Član 14.

Kontrolu namjenskog utroška dodijeljenih sredstava iz prethodnog člana ovog Pravilnika, vršit će Služba za poduzetništvo, lokalni razvoj i finansije, koja u tu svrhu može formirati posebnu stručnu Komisiju iz reda zaposlenika Općine Gračanica.

Član 15.

Članovi Komisije iz člana 7., 9. i 14. ove Odluke, ne ostvaruju pravo na naknadu za rad u Komisiji.

Član 16.

Odluka stupa na snagu danom njenog donošenja, a objavit će se u „Službenom glasniku Općine Gračanica“.

OPĆINA GRAČANICA

Nusret Helić